

Guru digesa baharui tekad

UM - 17/5/2007.

JOHOR BAHRU 16 Mei - Warga pendidik disaran menjadikan sambutan Hari Guru Ke-36 tahun ini dan kemerdekaan negara ke-50 sebagai pemangkin untuk membaharui azam, semangat dan tekad bagi melaksanakan agenda bersama ke arah melonjakkan kualiti pendidikan di negara ini.

Menteri Pelajaran, Datuk Seri Hishammuddin Tun Hussein berkata, pendekatan itu selaras dengan usaha kementeriannya untuk menjayakan Pelan Induk Pembangunan Pendidikan (PIPP) dan melaksanakan Misi Nasional.

Menurutnya, walaupun jasa dan sumbangan guru dalam perjuangan menuntut dan mengisi kemerdekaan sangat besar tetapi ia tidak bermakna perjuangan tersebut sudah selesai.

"Perjalanan kita (guru) masih jauh dengan tuntutan tugas yang semakin mencabar tetapi walaupun diberi harapan semakin tinggi, kita perlu terus melangkah.

"Inilah tugas guru yang menggalas amanah berat tetapi amat besar nilai dan maknanya," kata Hishammuddin.

Beliau berkata demikian ketika berucap pada majlis sambutan Hari Guru Ke-36 peringkat kebangsaan yang berlangsung di Pusat Konvensyen Antarabangsa Persada di sini hari ini.

Sambutan yang bertemakan Guru Penjana Modal Insan Gemilang - Terima Kasih Guru itu dirasmikan oleh Perdana Menteri, Datuk Seri Abdullah Ahmad Badawi.


Hadir sama ialah Menteri Besar Johor, Datuk Abdul Ghani Othman dan kira-kira 3,000 guru dari seluruh negara.

Menurut Hishammuddin, sebagai pendidik guru diberi tugas penting dalam melahirkan modal insan berkualiti yang berjiwa patriotik dalam membina dan mempertahankan kemerdekaan negara.

Beliau berkata, dalam meraikan Hari Guru dan kemerdekaan negara tahun ini, guru-guru harus bersyukur kerana mereka menjadi rakyat kepada sebuah negara yang dilimpahi nikmat dan kemakmuran.

"Kesyukuran itu pula perlu dimanifestasikan dengan rasa tanggungjawab dan komitmen untuk mempertahankan asas-asas kukuh yang telah membawa guru ke tahap sekarang," jelasnya.

Komitmen itu juga, kata Menteri Pelajaran, harus sejajar



ABDULLAH Ahmad Badawi menandatangani plak pada majlis pelancaran Sambutan Hari Guru Peringkat Kebangsaan Ke-36 di Johor Bahru, Johor, malam tadi. Turut hadir, Hishammuddin Tun Hussein dan Ketua Pengarah Pelajaran, Datuk Dr. Ahamad Sipon (kiri).

- Gambar MOHD. FARIZWAN HASBULLAH

dengan usaha kerajaan yang banyak membuat pembaharuan dan penambahbaikan berhubung profesion guru sejak tiga tahun lalu.

Pembaharuan-pembaharuan itu, kata Hishammuddin,

tidak termasuk manfaat dan faedah secara langsung dan tidak langsung yang bakal dinikmati guru di bawah projek-projek pembangunan Rancangan Malaysia Kesembilan (RMK-9).